

Hrvatska je odlučila da će odlagalište radioaktivnog otpada graditi u Trgovskoj gori, Čerkezovcu, općina Dvor, na samoj granici s Bosnom i Hercegovinom.

Na posljednjoj sjednici Vlade RH usvojena je Odluka o donošenju Nacionalnog programa provedbe Strategije zbrinjavanja radioaktivnog otpada, koja se temelji na pretpostavci da će se centralno skladište radioaktivnog otpada uspostaviti baš na ovoj lokaciji. Saopćio je to prije dva dana Državni zavod za radiološku i nuklearnu sigurnost Republike Hrvatske.

#### Političko pitanje

U ovoj odluci se navodi da bi se, nakon analize sigurnosti za uspostavu skladišta, trebala početi projektirati i graditi infrastruktura za dugoročno skladištenje otpada iz Krškog.

- Za sada se preferira površinski tip odlagališta - zaključeno je.

Iz naše zemlje još nema reakcija na ovu odluku. Oba doma Parlamenta BiH još su u julu 2015. odbila prijedlog da se radioaktivni otpad zbrinjava na ovoj lokaciji, a stručnjaci su upozoravali na opasnosti.

- Radi se o otpadu niske i srednje aktivnosti, koji je do sada išao prema Švedskoj pa se pepeo vraćao u Krško. Slovenija je nudila Hrvatskoj da za visoku naknadu koristi njihovu lokaciju. Hrvatska je odustala i odlučila da u Trgovskoj gori napravi skladište - kaže naš izvor iz Agencije za radijacijsku i nuklearnu sigurnost.

Ističe da bi skladištenje otpada na ovoj lokaciji bilo izuzetno opasno, naročito u vanrednim situacijama, poplavama, požarima...

- Kroz vodu i zemlju lako bi ugrozilo životnu sredinu, zdravlje ljudi, okolinu. Ali, naše vlasti to već znaju - dodaje on.

S druge strane, direktor Agencije Marinko Zeljko kaže da ne treba previše dizati paniku.

#### Nuklearni otpad

- Neće se to graditi za pola godine-godinu. Mi, u Agenciji, pratimo situaciju, ali to politika treba odraditi, Vijeće ministara, parlamenti - dodaje on.

Uz napomenu da se i pomalo šali, Zeljko kaže:

- To će vam biti kao sa Pelješkim mostom, borba... treba graditi, ne treba graditi pa će na kraju biti da nismo na vrijeme reagirali. Naša posla - kaže Zeljko.

Slaže se s njim i Drago Bundalo, načelnik Bosanske Kostajnice.

- Državni organi ništa nisu uradili da zaštite svoje građane. Ovo nije nikakva općinska, entitetska, već državna priča. Dvije države trebale bi se dogovoriti. U blizini Une i granice, Parka prirode, ne treba biti odlagalište nuklearnog otpada. Nuklearni otpad ne bi smio biti blizu granice bilo koje države, a bez saglasnosti one druge. Ne smijemo tako lako ugroziti zdravlje ljudi i generacija koje dolaze - zaključuje Bundalo.

Očekujemo da nas zaštiti država BiH

Mario Crnković, predsjednik Udruženja “Green Team Centar” iz Bosanskog Novog, ne krije ogorčenje zbog odluke Vlade Hrvatske, jer se, ističe, potencijalno odlagalište nalazi samo 850 metara zračne linije od rijeke Une, koja slovi kao prirodni biser.

- Do sada smo na razne načine, u ime građana Bosanskog Novog, upozoravali da je Trgovska gora neadekvatna. To je seizmički aktivna lokacija, građena od poroznog i vodopropusnog materijala. Iskreno, očekujemo da nas vrh države zaštiti i ne dozvoli da se to ruglo nađe u blizini ljudi. Ići ćemo, vjerovatno, i s tužbom. Ova odluka Vlade Hrvatske direktno krši sve norme zaštite životne sredine, ali i prava ljudi da žive u zdravom okolišu - kazao je.

Izvor: energetika.ba